

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին թիվ 2316184922 և 2316174442 որոշումները բեկանելու և վարչական իրավախախտումների վերաբերյալ գործերի վարույթները կարճելու մասին

<<20>> 04 2023թ. 7-13

3688

ք.Երևան

Ճանապարհային ոստիկանության պետ, ոստիկանության գնդապետ Ն.Սարգսյանս, վերանայելով <<Լիլ-Ռուզ>> ՍՊԸ-ի տնօրեն՝ Գագիկ Գրիգորյանի ՄԳ/63081-23 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

<<Լիլ-Ռուզ>> ՍՊԸ-ի տնօրեն՝ Գագիկ Գրիգորյանը (ծանուցման հասցե՝ քաղաք Երևան, Արաբկիր վարչական շրջան, Մամիկոնյանց փողոց, 21/42) դիմումով խնդրել է բեկանել Ճանապարհային ոստիկանության վարչական տույժ նշանակելու մասին թիվ 2316184922 և 2316174442 որոշումները նշելով, որ իրավախախտումները կատարվել են հարկադրված, քանի որ տեղում շինարարական աշխատանքների վերահսկողություն իրականացնելու համար շինարարական տեղամաս հնարավոր չի եղել մուտք գործել այլ ճանապարհով:

Դիմումի քննարկման արդյունքում պարզվել է, որ դիմումատուի խնդրանքը ենթակա է բավարարման մասնակի հետևյալ պատճառաբանությամբ.

<<Վարչարարության հիմունքների և վարչական վարույթի մասին>> օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

<<Տեսանկարահանող կամ լուսանկարահանող սարքերով հայտնաբերված ճանապարհային երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին>> օրենքի 3-րդ հոդվածի 1-ին մասի համաձայն՝ վարչական վարույթի իրավախախտման հատկանիշների պարզման փուլում իրավախախտումը հիմնավորող ապացույցը իրավախախտումն ամրագրած տեսանյութն է կամ լուսանկարը, որը պարունակում է նաև տեխնիկական միջոցով արձանագրված տվյալները: Նույն հոդվածի 2-րդ մասի համաձայն՝ որպես իրավախախտումը հիմնավորող ապացույց վարչական կամ դատական կարգով բողոքարկման վարույթում կարող են օգտագործվել Վարչական իրավախախտումների վերաբերյալ Հայաստանի Հանրապետության օրենսգրքի 251-րդ հոդվածով նախատեսված ապացույցները:

Վարչական իրավախախտումների վերաբերյալ ՀՀ օրենսգրքի 251-րդ հոդվածի 1-ին մասի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ: Ըստ նույն հոդվածի 2-րդ մասի՝ այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության ենթարկվող անձի բացատրություններով, տուժողի,

վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

ՀՀ կառավարության <<Ճանապարհային երթևեկության կանոնները և տրանսպորտային միջոցների շահագործումն արգելող անսարքությունների ու պայմանների ցանկը սահմանելու մասին>> 28.06.2007թ. թիվ 955-Ն որոշման 49-րդ կետի համաձայն՝ հետընթացն արգելվում է խաչմերուկներում, մերձակա տարածքից ճանապարհ դուրս գալիս և կանոնների 50-րդ կետում թվարկած տեղերում, իսկ 50-րդ կետի 7-րդ ենթակետի համաձայն՝ հետընթացն արգելվում է նաև միակողմ երթևեկությամբ ճանապարհներին:

Վարչական իրավախախտումների վերաբերյալ ՀՀ օրենսգրքի 124-րդ հոդվածի 14-րդ մասի համաձայն՝ տրանսպորտային միջոցը միակողմանի երթևեկությամբ ճանապարհով տրանսպորտային միջոցների հոսքին հակառակ ուղղությամբ (այդ թվում՝ հետընթաց) վարելը՝ առաջացնում է տուգանքի նշանակում՝ սահմանված նվազագույն աշխատավարձի քսանապատիկի չափով, տուգանային միավորի կիրառում՝ 3 միավոր:

Վարչական իրավախախտումների վերաբերյալ ՀՀ օրենսգրքի 124-րդ հոդվածի 9-րդ մասի համաձայն՝ տրանսպորտային միջոցների վարորդների կողմից երթևեկությունն սկսելու կամ մանևր կատարելու, ինչպես նաև հետընթաց վարման կանոնները խախտելը առաջացնում է տուգանքի նշանակում՝ սահմանված նվազագույն աշխատավարձի հնգապատիկի չափով, տուգանային միավորի կիրառում՝ 1 միավոր:

Նույն հոդվածի 38-րդ մասի համաձայն՝ սույն հոդվածի 5-րդ, 7-րդ, 9-րդ, 12-րդ, 13-րդ, 19-րդ կամ 30-րդ մասերով նախատեսված վարչական իրավախախտումն ունի նվազ նշանակություն այն դեպքում, երբ դրա հետևանքով երթևեկության մյուս մասնակիցների համար խոչընդոտ կամ վթարային իրադրություն առաջացնելու ակնհայտ վտանգ չի ստեղծվել, ինչպես նաև այն դեպքում, երբ իրավախախտումն անխուսափելիորեն կատարվել է երթևեկության այլ մասնակցի գործողության կամ անգործության պատճառով:

Վարչական տույժ նշանակելու մասին թիվ 2316184922 և 2316174442 որոշումների հիմքում դրված տեսանյութերից հստակ երևում է, որ <<MERCEDES-BENZ>> մակնիշի 990Q099 հաշվառման համարանիշի տրանսպորտային միջոցի վարորդը 20.03.2023թ. ժամը՝ 16:27-ին և 18.03.2023թ. ժամը՝ 15:12-ին Երևան քաղաքի Թամանյան – Իսահակյան փողոցների խաչմերուկի հատվածում միակողմ երթևեկությամբ ճանապարհով տրանսպորտային միջոցը հետընթաց է վարել տրանսպորտային միջոցների հոսքին հակառակ ուղղությամբ և հետընթաց է կատարել նույն խաչմերուկում, սակայն միևնույն ժամանակ չի ստեղծել երթևեկության մյուս մասնակիցների համար խոչընդոտ կամ վթարային իրադրություն առաջացնելու ակնհայտ վտանգ:

Շինաշխատանքները կատարող <<Լիլ-Ռուզ>> ՍՊԸ-ի տնօրեն՝ Գագիկ Գրիգորյանը ներկայացրել է որպես շինաշխատանքների պատվիրատու՝ Երևանի քաղաքապետարանի գնումների վարչության պետի ժամանակավոր պաշտոնակատար Ի.Օսիպյանի կողմից հաստատված ծառայությունների մատուցման գնման N<<ԵԲ-ՀՐՄԽԾՁԲ-22/61-1>> պայմանագիրը և Երևան քաղաքի Թամանյան-Իսահակյան փողոցների խաչմերուկի հատվածում՝ մասնավորապես Թամանյան փողոցում վերանորոգման աշխատանքների կատարման վերաբերյալ հիմնավորող փաստաթղթեր:

Այսպիսով, հաշվի առնելով գրության մեջ նշված հանգամանքները, ինչպես նաև Գագիկ Գրիգորյանի կողմից շինտեղամաս մեկ այլ ճանապարհով մուտք գործելու անհնարինությունը վարչական տույժ նշանակելու մասին վերը նշված որոշումները ենթակա են բեկանման:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 21-րդ հոդվածով, 247-րդ հոդվածի 1-ին մասի 1-ին կետով և 293-րդ հոդվածի 1-ին մասի 3-րդ կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին թիվ 2316184922 և 2316174442 որոշումները բեկանել և վարչական իրավախախտումների վերաբերյալ գործերի վարույթները կարճել.
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում.
3. Սույն որոշման օրինակն ուղարկել Գագիկ Գրիգորյանին:

Կատարող՝ Ա.Սահակյան
Հեռ.011544783



Լ.Սարգսյան